



UPA2015/23

29. april 2015

Michael Rosing

Allanut ajunngitsuliorneq inuiaqatigiinnik kivitseqataaneq, utertitsiffigineqarnissamik akissarsinissamilluunniit siunertaqanngitsoq, inooriaatsitsinni annertunerujussuarmik ileqquliuteqqittariaqarnerata qanoq iliornikkut aaqqissuussamik piviusunngortinneqarsinnaanera pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Inatsisartut Vivian Motzfeldt, Siumut)

(Siullermeerneqassaaq)

Qangarsuaaniilli immitsinnut ikiortarpugut. Kalaallit ileqqutoqaaasa kusarnartut ilagaat neqimmik pajuttarneq. Piniariareerluni tikikkaanni pisaq ilarujussua ilaqtannut ikinngutinullu pajugutigineqartuaannarpoq. Ileqqutoqaaq taanna tammariartulerpoq aningaasat atornerqariartornerat peqatigalugu. Pisat nioqqutigineqartalerput ileqquujuunnaarluni pajuttornissamut pisussaaffeqarneq.

Imminut ilaqtannillu pilersuisussaataaneq taarserlugu pisortat ikiueriaaseqarnerannut tunngatillugu periuseq danskit socialdemokraatiinnit eqqunneqarnikuusumi kingornussatsinni aamma taamaappoq. Naalagaaffiulli aquataa tungiuinerup ajortortaraa namminersorlutik oqartussanut naalakataartussanngortitaasimanerput. Aatsaat ilinniassaagut namminersorlutik oqartussat akiliippata. Naatsorsuutigaarput namminersorlutik oqartussat inissatsinnik pilersussagaatigut. Naatsorsuutigaarput namminersorlutik oqartussat akissaatigissaartunik suliffissanik nassaarutissagaatigut. Aamma naatsorsuutigaarput namminersorlutik oqartussat naapertuuttumik akilinnik innaallagissamik, imermik kiassarnermillu pilersussagaatigut.

Taamatut inuunitsinnut naatsorsuutigisaqarnerput sualunnguit ilanngussorlugit pilersaarusionerqartarpoq tamannalu tulluannngilluinnarpoq ullutsinni Kalaallit Nunaata namminersortunngornissaanut oqallinnerujussuarmut. Demokraatini isumaqarpugut inuit ataasiakkaat kiffaannngissuseqarlutik misigisimanissaat pingaarnarpaasoq naalagaaffiup



aaqqissuussaaniq kiffaanngissuseqarnermut piviusorsiorpiannngitsumut taamaattumillu innuttaasunit malugineqarpiarneq ajortumut, naleqqiullugu. Taamaattuminguna namminersorlutik oqartussat taamarsuaq qulangiisimanagerat iluarinngikkipput. Taamaattumik aamma isumaqarpugut ingerlatsivippaalussuit namminersortunngorsartariaqartut inuit ataasiakkaat kiffaanngissuseqalerniassammata nammineq kissaatigisartik naapertorlugu inuunerminnik ilusilersuinissaminnut.

Inuunitsinni namminersorlutik oqartussat qulangiisimanagerujussuisa peqataanik ukiut kingulliit ingerlanerini aamma misigaarput politikkikkut oqallinnermi inuiaqatigiinni assigiinngitsukkuutaat avissaartuutsinneqartut. Illoqarfiit nunaqarfinnut unammippoq, illoqarfeeqqat Nuummut. Aalisartut piniartullu sulisartunut taavalu nungullartussaannngitsaq sakkunnaarineqartorlu danskisut oqaluttut kalaallisut oqaluttunut. Avissaartuuttuassagutta allanut ikiuukkumassuserput milliartortuassaaq. Pisariaqartipparput Kalaallit Nunaat nunatut ataatsimoorfiusoq nuannaarutigalugu assigiinngissuteqarnerput, ajornartorsiutitut isiginagu.

Demokraatit partiiuvoq socialliberaaliusoq. Naalagaaffik upperaarput imaluunniit Kalaallit Nunaannut tunngatillugu namminersorluni oqartussaaneq, ikiuuttartussaq inuit ataasiakkaat ikiorneqarnissaminnut pisariaqartitsippata. Isumaqarpugulli suarsunnguit tamaasa ilanngussorlugit namminersorlutik oqartussat aqutsissanngitsut. Upperaarput inuit ataasiakkaat pilluarnissaannut apeqqutaasoq nammineq iliuuseqartarneq, nammineq ilaquttallu atunga at pitsanngorsarumallugit. Aamma upperaarput, inuiaqatigiinni inuit ataasiakkaat nammineq piomassertik tunngavigalugu sulinerikkut namminneq atukkaminik allallu atungaannik pitsanngorsaajumassusillit ornissagutsigit taava peqataanik suut tamaasa qulaaniik aqussinnaanngilagut.

Taamatut oqaaseqarluta oqallittoqarluarneranut qujavugut.